

10 FEB 2002

AGONG UCAP TAHNIAH KEPADA IRAN SEMPENA HARI REVOLUSI

KUALA LUMPUR, 10 Feb (Bernama) -- Yang di-Pertuan Agong Tuanku Syed Sirajuddin Putra Jamalullail telah mengirim perutusan tahniah kepada Presiden Iran Mohammad Khatami sempena ulang tahun ke-23 Hari Revolusi republik itu.

Menurut Wisma Putra, Seri Paduka mendoakan semoga Khatami berada dalam keadaan sihat sejahtera dan rakyat Iran menikmati keamanan, kemajuan dan kemakmuran.

Perdana Menteri Datuk Seri Dr Mahathir Mohamad dalam perutusan kepada Khatami menarik perhatian bahawa hubungan antara Kuala Lumpur dan Tehran telah bertambah kukuh.

"Saya mengambil kesempatan ini untuk mengulangi hasrat Malaysia untuk memperluaskan skop kerjasama demi kepentingan bersama kedua-dua rakyat dan negara," kata beliau.

Menteri Luar Datuk Seri Syed Hamid Albar pula menghantar perutusan kepada rakan sejawatannya Dr Kamal Kharrazi sambil melahirkan keyakinan bahawa hubungan dan kerjasama erat antara kedua-dua negara akan bertambah kukuh demi kepentingan bersama.

-- BERNAMA  
RV AZZ FAZ